

Léiw Kamerodinnen a Kameroden,

Den 12. Kongress vun déi Lénk fënnt an enger Zäitperiod statt wou et ëmmer méi kloer gëtt datt déi Welt, sou wéi mir se an deenen läschten Joerzénge kannt hun, vu staarken Convulsioune geprägt as. Daat gëllt zemoos fir den europäeschen Kontinent, also och fir Lëtzebuerg.

Déi allermannst vun eis waren vun der Finanzkrise iwwerrascht. Spéitstens zanter dem Marx an dem Engels, awer och dem Kondratieff, och dem Ernest Mandel wësse mer datt den Kapitalismus aus laangen progressiven a regressiven Wellen besteet. Daat eenzegt waat een nie virausgesi kann, as wéini et ufänkt, a wou a waat fir eng Form et unhëllt.

Waat eis intresséiert, as wouhinner et hiféiert. Waat sin d'Perspektiven vun dëser Crise ? Näischt as festgeschriwwen. Deen Deel vun der Geschicht musst d'Menschheet selwer schreiwen, dorënner, daat as daat wichtegst, déi fortschrëttlechste Elementer an der Gesellschaft.

Déi éischt politesch Konsequenz vu Relevanz vun dëser Crise huet a Griechenland stattfonnt, den 25. Januar, mam Wahlerfolleg vun eisen Kameroden vu Syriza. Et sin haut genau 3 Méint hir datt eisen Kamerod Alexis dës histoersch Regierung féiert.

Dës 3 Méint hun eis schon vill beléiert. Et as déi éischte Kéier zanter dem 2. Weltkrich datt an Europa eng antikapitalistesche Regierung gewielt gëtt – vläit as et esouguer déi éischte Kéier an der Geschicht datt daat an engem industrialiséierten Land geschitt. Mir gin dovunner aus datt et réischt den Ufank as.

Mir sin an enger eeschter a schwéierer Situatioun. Mir régéieren net an en normalt Emfeld mee an enger Situatioun vun zougespëtzter Crise. Och wa mir déi grouss Majoritéit vum Vollék hannert eis hun, gëtt et nach ëmmer eng muechtvoll Minoritéit vu Ultrakapitalisten an deenen hir Handlanger an den aneren EU-Regierungen, an der Kommissioun, an der EZB, déi d'Soen huet an déi alles drusetzt fir d'Regierung vum Vollék a Griechenland op d'Knéien ze zwengen, wéi de Robert Goebbels daat jo och gesoot huet.

Emstänn wou Lénker – ech menge richteg Lénker – eng Regierung bilden si rare a fannen quasi ëmmer an Ausnahmsituatiounen statt. Am Kontext vum 1. Weltkrich zum Beispill.

Oder fir aus der Kombinatioun vu Kolonialismus an Ennerentwécklung erauszekommen wéi an Asien oder Afrika.

Oder nach virun extreemen Ausbeutungsverhältnesser vu periphere Länner mat enger brutaler Oligarchie déi och nach op den Sakkurs vun der éischer Weltmuecht ziele kann, wéi daat de Fall a Latäinamerika as.

Kuerz gesoot : emanzipatoresch Kräften müssen dann ëmmer hir historesch Verantwortung iwwerhuelen wa bis d'Gesellschaft an enger déiwer Krisensituatioun geroden as.

Déi griechesch Situatioun as eng aner – a hirer Natur a villen Hinsichten nei Situatioun.

Trotz der katastrophaler sozialer Situatioun gehéiert Griechenland, als EU-Member, dem klengen Zirkel vun kapitalisteschem héich-industrialiséierten Länner un.

Déi europäesch Natiounen – och mir – sin trotzdeem an en Ofhängegkeetsverhältniss gefaangen. Déi demokratesch Souveränitéit vun den Staaten as schon längstens staark lädériert – net duerch Frontalieren, net duerch Ausländer oder Réfugié'en, mee ganz kloer duerch d'Industrie vum Finanzkapital - d'Finanzmäert, wéi se genannt gin.

A vun allen EU-Memberen as Griechenland daat Land waat am stäerksten an daat Ofhängegkeetsverhältnis gerutscht as.

Griechenland as den Laboratoire vum europäeschem Neoliberalismus gewiecht. Awer zanter dem 25. Januar as et den Laboratoire vun der europäescher Resistenz géint dës Politik.

Eng Resistenz där näischt erspuert bleiwt.

- 27 EU-Regierungen déi an eng aner Richtung zéien an eng reaktionär Richtung zéien
- En groussen Deel vun der Mainstream-Press déi net opkläert oder schlecht oder selwer schlecht informéiert

as, wann se net grad déi offiziell Logik verinnerlecht huet.

- Supranational Institutiounen (EU-Kommissioun, Eurogrupp, EZB, FMI) déi demokratesch legitim Regierungen neutraliséieren
- An d'Finanzkapital selwer oder ganz einfach nëmmen d'Kapital.

Niewt dësen externen Elementer, gin et awer och intern Schwierigkeeten :

- Eng Regierung ze stellen ouni iergend eng Erfahrung am régéieren ze hun
- En Staatsapparat z'iwwehuelen deen nach zum groussen Deel an den Hänn vun den Virgängerparteien as an deen der neier Regierung d'Régéieren sou schwéier wéi méiglech mécht. Mir sin d'läscht Woch gewuer gin datt ganz vill Syriza-Ministeren 2 Woche laang den Accès net kruten fir an den Informatiksystem vun hiren Ministären eranzegoen.
- En Equiliber ze halen fir souwuel d'Eurozon net wëllen ze verloossen an awer och eng lénk Politik ze bedreiwen – wéi laang daat dauert an ob déi Rechnung opgeet wäerte mer geschwenn gesin
- D'Gefor ze laafen de Lien mat der Bevölkerung ze verléieren an net daat anzehalen firwaat ee gewielt gouf.

Dem Optimismus vum Wëllen stellt sech dem Pessimismus vun der Intelligenz entgéint. Mam Gramsci muss een all schlimmsten Hypothese vun enger schwéierer Situatioun betruechten fir dann all Reserven vun Energie auszeschöpfen. All déi Energien déi mir brauchen a brauche wäerten fir dee Muechtkampf tëscht dem Vollék an den Finanzmäert ze gewannen.

Léif Kamrodinnen a Kameroden,

Déi lëtzebuenger Verhältnesser sin anerer wéi déi griechesch – awer just an den Symptomer : Waan Griechenland 41 Grad féiwer huet, dann huet Lëtzebuerg eréischt 38 Grad féiwer. Mee d'Krankheet as déiselwecht. An de Probleem as deen, datt d'Rezepter déi applizéiert gin och déiselwecht sin. Just d'Dosis ännert. Griechenland huet eendeiteg vill méi Gëft geschléckt wéi Lëtzebuerg.

De Probleem as jo deen datt mir mat enger Regierung konfrontéiert sin, déi Remedur mat Gëft verwiesselt. Wéi soot scho méi de Premier Bettel ? « Steiererhéijungen si Gëft fir d'Ekonomie ». Natierlech schwätzt de liberale Premier vu Steiererhéijungen fir d'Kapital, respektiv fir déi räich.

Alles waat usatzweis d'Intressen an d'Privilegien vun der Oberklass a Fro stellt as Gëft fir de Premier.

De Premier kann awer ganz gudd domadder liewen datt d'Mëttelschichten an déi ënnescht Klassen Sacrifissen agoe mussen.

D'Leit duechten si kréichen mam Bettel e Mini-Thorn, mee si kruten e Baby-Thatcher.

Iwwert 1 Joer as Blo-Rosa-Gréng am Amt. Mir kennen elo dës Regierung charakteriséieren.

Aus historeschen Grënn gëtt zu Lëtzebuerg traditionnell d'CSV um rietse Spektrum ugesiddelt an alles waat net kathoulesch/konfessionnell as op der lénker, also och d'DP. Daat geet zréck op den Bloc des gauches wou liberal Notablen mat Notablen vun der Arbechterpartei sech géint der Kierch hiren politeschen Arm, der Rietspartei, alliéiert hun.

An der Tëschenzäit huet Lëtzebuerg sech wäitgehends säkulariséiert. Den Magistère des âmes, dee sozialen Rôle, an deelweis Ennerdréckungsrolle, deen d'kathoulesch Kierch zu Lëtzebuerg gespillt huet, as spéitstens zenter den 80er Joeren ëmmer méi geschwächt gin.

Homoehé kann agefouert gin, d'Ofdreiwung moderniséiert gin – dogéint gëtt zu Lëtzebuerg – glécklecherweis – nach manner mobiliséiert wéi a Länner déi den Laizismus als quasi Staatsreligion ugeholl hun.

Mir ennerstetze selbstverständlech all gesellschaftspoliteschen Fortschrëtt, souwuel deen wou

d'Regierung aféiert wéi och deen wou nach Nohuelbedraf besteet.

Mee an eisen Aen gëtt et keen definitiven Fortschrëtt ausserhalb vun der sozialer an ökonomescher Fro.

Eise Motto soll net dee sin « D'CSV an der Oppositoun ! », eise Motto muss heeschen « Den Neoliberalismus an der Oppositoun ! »

Mee do wou et schwéier schéngt potentiell Alliéiert ze fannen am parlamentareschen Spektrum, as et emsou méi wichteg a méiglech Alliéierter ausserhalb vun der Chamber ze fannen.

Déi Alliéiert fanne mer bei den Gewerkschaften, bei den Umweltorganisatiounen a Konsumenschutzorganisatiounen a bei all form vun sozialer Mobiliséierung. Wa mir dovunner ausgin datt d'Gesellschaft sech ëmmer méi géint sozialen Ofbau wiert, sech ëmmer méi géint demokrateschen Ofbau wiert. Wa mir dovunner ausgin datt et och emmer méi Leit wäerten bereed sin sech kollektiv z'organisieren fir kollektiv Rechter ze verteidegen an auszubauen, dann hu mir Alliéierter an alle Schichten vum reale Vollék, vun den realen Forces vives de la Nation also all déi déi eppes schaafen an zur Gesellschaft bäidroen.

An daat sin net déi, déi hir Zäit domadder verbréngen sech Gedanken ze maachen wéi se am beschten d'Steierverwaltung beducksen. Och wann si den Terme

« Produkt » gebrauchen fir hir Steierhannerzëiungstricker ze bezeichnen, produzieren déi guer näischt.

Mat Griechenland hu mer gesin wéi den Finanzkapitalismus ouni iergendeng Schimt e ganzt Vollék wëllt versklaven an duerch seng eegen Presseorganer och nach d'Ligen verbreed d'Griechen hätten de Chaos selwer ugericht.

Wou d'Affaire LuxLeaks erauskoum haaten d'Finanzoligarchen hei zu Lëtzebuerg op eemol hire Patriotismus entdeckt an hun sech net généiert grotesk Verschwörungstheorien an d'Welt ze setzen. Déi bescht war : et wier fir den Jean-Claude Juncker ze liquidieren. Wéi wann en internationalen Konsortium esou eng Débauche vun journalistesche Moyen'en géif ausnotzen fir en – entschëllegt – austauschbaren Politiker ze stierzen.

Also : waat war LuxLeaks ? D'Spetzt vum Aisbierg an deen Aisbierg as de weltwäiten System fir Steierflucht z'erméiglechen.

Multinationaler sin net nëmmen Gesellschaften déi sech international organiséiert hun fir hirem « core business » nozegoen mee sin global Organismen déi fir d'Profitmaximéierung vun hiren Besetzer suerge sollen.

Fir déi Profitmaximéierung ze sécheren liwweren sech Finanzplazen en weltwäiten Krich vun der sougenannter Steieroptiméierung.

Den Finanzkapitalismus huet sech esou eng weltwäit Palette vun Territorien organiséiert fir dee Mehrwert, dee jo vun iergendengem eng Kéier geschaafe gouf – net mussen un d’Gesellschaft zrëckzegin - also un déi schaffend Leit.

Waat as en Territoire deen dofir do as friembestëmmtent Intressen – also net déi Intressen vun der lokaler Populatioun – ze déngen ? Daat nennt een eng Kolonie. A Lëtzebuerg as eng vu villen Kolonien vun der Finanzindustrie.

Et sin net den portugieseschen Bauarbechter oder de franséische Garçon, déi di national Souveränitéit ënnergruewen.

Déi national Souveränitéit as schon längstens verkaaft gin. Un d’Finanzoligarchie, déi sech mol net méi verstoppt.

Daat beschte Beispill as jo den Alain Kirsch, CEO vun EY, deen d’DP mat an d’Verhandlungsdelegatioun geholl haat, deen awer keng Loscht haat Minister ze gin, well e wahrscheinlech säi Salaire hätt missen duerch 10 deelen. Firwaat esou e Sacrifice agoen wann een souwisou deen as wou de Premier urifft wann hien net méi weider weess ? Wann et dache sou einfach as esou eppes wéi d’Intérêts notionnels an en Koalitionsaccord anzeschreiwten. Déi goufen zwar ofgewiert, ennert anerem wéinst eiser, mee et soll een oppassen datt se net erem op enger anerer Plaaz optauchen !

Zanter Méint tagt an der Chamber eng Ennerkommissioun déi den Droits des sociétés soll änneren. Vun den 5 Députéiert

déi dra setzen, sin der 4 avocats d'affaires, et wieren der bestëmmt 5 gewiecht wann déi Gréng och een an hirer Fraktioun gehaat hätten. Mee et setze jo genuch Expert'en dran.

Datt déi Leit sech an den Droit des sociétés auskennen, stelle mir guer net a Fro. Et as jo hir Arbecht. Daat esou duerzestellen datt si keng Partikularintressen verfollegen, datt si als Députéiert den Intérêt général verteidegen wann se als Affekot mam Intérêt particulier hirt Brout verdéngen, as méi wéi naiv.

Eis geet et net drëms Leit ze dénonzéieren oder engem Députéierten iergend eng Arbecht ze verbidden. Mir sin awer der Meenung datt d'Bierger ganz kloer solle wëssen wien waat fir Intressen vertritt.

Manchmol kommen se an d'Labrennten mat hiren Expertisen. Zum Beispill waat de Konflikt mat Russland ugeet.

Am Prinzip sin si jo déi gréissten Nato-Unhänger, déi treisten Mippercher vum US-Imperialismus. Mee - !aua ! – vu datt d'Sanktiounen géint Russland hirem eegene Business schiedegt well déi russesch Oligarchie staark Intressen op der Finanzplaz huet, dann fannen se op eemol datt hir amerikanesch Frënn e bessen iwwerdreiwten.

Schon nëmmen unhand vun deem Beispill erkennt een wéi komplex déi ukrainesch Affaire as.

Eis as et kloer datt et net ëm Menschrechter geet. Der EU geet et net em Menscherechter, den USA bestëmmt och net. A Russland och net.

Déi 3 Bléck gin vun hiren jeweilegen mënschefeindlechen Oligarchien dominéiert. Et kann een de Russe loossen datt se mol net versichen den Uschäin vun Demokraten ze hun. Si bedreiwen wéinstens oppenen Imperialismus oder Möchtegernimperialismus, a si frou datt d'Nazien zu Kiew vun den Riestextreemer zu Moskau oflenken.

D'Ukrain méi prezis wéi ganz Europa am generellen sin d'Geiselen vum Intressenskonflikt tëschent den Bourgeoisie'en vun den USA a Russland. Déi europäesch Bourgeoisie'en sin, wéi ëmmer, gedeelt – oder besser gesot – wann et eng gesamteuropäesch Bourgeoisie géif gin, wier se gedeelt. Bis elo hun déi europäesch imperial Bestriewungen (déi franséisch, déi britesch, déi däitsch) sech géigesäiteg neutraliséiert – daat as wouméiglech besser wéi d'Opkommen vun engem EU-Imperialismus deen der Welt bestëmmt näischt guddes brénge géif.

Eis Aufgab als Lénk as net evident : och wann et kloer as datt den US/Nato-Imperialismus ganz kloer den russeschen Imperialismus provoziert huet, solle mir zu kengem sengen Wasserträger gin.

Alles, awer och alles, soll ënnerholl gin fir den Friden an Europa ze sécheren. Ouni Sympathien fir de Kreml ze hun, refuséiere mir iergendeng Form vu Provokatioun a Richtung

Moskau a faalen a kenger Propaganda eran, ob se vu Russia Today kënnt oder vun CNN.

Dofir hu mir och den Assoziatiounsvertrag tëscht der EU an der Ukrain verurteelt. Et musse en hei erem ennersträichen datt deen Accord, daat gouf net esou oft gesot, och e militäreschen Volet virgesin huet.

Russland gëtt net vun Engelen dominéiert. Heescht daat datt mir Engele wieren ? Et kënnt a läschter Zäit eng ongesond Astellung erem op, déi un de kaale Krich erënnert oder prinzipiell un all aner Kricher, wou den Kontrahent als Monster duergestallt gëtt a mir wieren déi läscht Verteideger vun der Fräiheet a vun der Mënschlechkeet.

De Westen huet dës Arroganz. Eis Regierungen an zum Deel och eis Intelligentsia as blann op engem A. Déi relativ individuell Fräiheeten déi mir an Europa erkämpft hun – an déi allerdéngs zereckgeschrauwte gin – däerfen eis net ze vergiesse gin datt « mir » bei wäitem net onscholleg sin un de Misär an der Welt. Au contraire souguer.

Eis Methoden si méi subtil awer net manner verheerend. Si heeschen zum Beispill strukturell Reformen. Déi Reformen déi den Ukrainer vum FMI – deen ni, ni, ni iergendwou op der Welt, iergendeppes aneschters fäerdegbrecht huet wéi Länner an de Ruin ze driiwen – opgedrängt gin zum Beispill.

Et kann een och dee gréisste Misär veranstellen – ouni Waffen, mee mat Rentekierzungen, Liberaliséierungen a

Privatisierungen déi öffentlech Servisser ofschaafen an deementspriechend net méi no de Besoin'en vun de Leit kucken, mee no hierer Finanzkapassitéit.

Et kann een duerch esou Reformen d'Arbeitsrecht esou reduzieren datt den Salarié sech ëmmer manner op senger Arbeitsplaz verteidege kann an emmer méi der Willkür vum Betriebseegner muss adaptieren.

All dës sougenannten Strukturreformen destruktieren a Wierklechkeet d'Gesellschaften. Daat féiert net nëmmen zur Armut. An massiv Armut kann zu méi graven Konflikter féieren wéi Biergerkrich oder Krich tëschent Natiounen.

Déi allermannst sech deem bewosst, mee d'EU dréit op eng massiv Art a Weis zu Sozialofbau Weltwäit bäi ? Wéi ? Mee zum Beispill iwwert déi sougenannten Associatiounsverträg tëscht der EU an aner Géigenden an der Welt. Oft sin daat Entwécklungsgéigenden wéi Zentralmerika oder Westafrika.

Dovunner gött leider wéineg geschwaat. Et musse e schon spezialiséiert Litteratur vun ONG'en liesen fir genau doriwwer bescheed ze wëssen.

An der Chamber gin dës Verträg massiv an unanim ugeholl – also baal unanim well eis 2 Députéiert sin ëmmer déi eenzeg déi dergéint stëmmen an och en long et en large erklären firwaat.

Leider fënnt daat och baal keen Echo an der Press – obwuel dës Accord'en Honnerten vun Dausenden wann net Milliounen vu Mënschen an hire Grondrechter beschneiden.

Et gëtt sech zwar unanim iwwer de Misär, den Hunger an der Armut lamentéiert. Awer keen wëllt a Wierklechkeet agesin datt mir deen organiséieren – datt den Westen den Haptbrandstefter as !

Fir deem Misär deen d'EU matfabrizéiert z'entkommen versiche reegelméisseg Dausenden vu Mënschen iwwert d'Mëttelmier ze reesen. Ech brauch jo net ze rappeléieren wéi geféierlech daat as.

Frontex, déi Mëttelmiermauer vum realexistéieren Kapitalismus, muss ewech. Frontex as Mord. A wie Frontex ënnerstetzt as Kompliz !

Läschten Donneschden hun sech iwwer 100 Leit op der Plëss an der Stad versammelt fir e Cercle silencieux ze bilden fir un d'Opfer vu Frontex ze gedenken.

Et gëtt awer eppes dozou ze soen : do ware Leit, Politiker, Députéiert a fréier Ministeren, déi do waren, fir d'Zirkunstanzen och eng traureg Minn gezunn. Ech war rosen an ech war net deen eenzegen dee rose war. Well ennert deenen Politiker waren der eng jett déi dee ganze Systeem vun Handelspolitik vun ultra-atlantisteschem Nato-Getreien, Leit déi Frontex am Alldaag justifizéieren. Déi Hypokrisie as dach net méi ze packen ! Daat muss een awer och kënne soen.

Et as jo schéin a gutt wann een den Opfer gedenkt, mee mir mengen datt et besser as kloer Responsabilitéiten politescher Natur opzeweisen. Kloer ze soen wien as schold un dee Misär an déijéineg déi dës politesch Verantwortung droen ze bieten entweder hir Haltung ze änneren oder dee Minimum vun Anstand hun sech vu solchen Manifestatiounen fernzehalen.

Dee politeschen Drock muss een op si kënnen ausüben – well et geet em Mënscheliewen.

Déi europäesch Oligarchien imposéieren net nëmmen den Entwécklungslänner Fräihandelsaccord'en, mee si versichen zesammen sou Accord'en och hiren eegenen Populatiounen z'imposéieren.

TTIP, CETA, TISA... all déi Ofkierzungen gin ëmmer méi bekannt. Awer nach net genuch – et müssen nach méi Effort'en gemaach gin – vun eis awer och vun den ONG'en.

Je méi Leit dovunner Bescheed wëssen, desto manner Chancen hun dës Accord'en duerchzekommen.

A mir müssen daat weidersoen, fir déi déi et nach ëmmer net verstanen hätten : daat si keng Handelsaccord'en ! Et geet guer net em Handel ! En Handelsaccord besteet doranner wann 2 Entitéiten sech verstännegen fir hir respektiv Produkter innerhalb vun engem gewessenen Kader ze tauschen.

Bei dësen Accord'en geet et a Wierklechkeet dorëms sozial Normen, sanitär Normen, an Emweltnormen, je all

Regulatioun déi demokratesch étabiléiert goufen fir d'Leit ze schützen ze emgoen.

Genausou wéi d'Steieren sin dës Normen weider Hürden fir d'Profitmaximéierung vun de Multien.

Daat as d'Essenz selwer vun dësen Accord'en. Dofir gëtt et näischt ze négociéieren. Wien erzielt et wier méiglech e gudden TTIP auszuhandelen, deen as entweder sou naiv datt en nie méi dierft zreckgewielt gin, oder en litt – oder – nach méi schlëmm, daat entsprécht sengen eegenen Partikularintressen.

Et gëtt kee gudden TTIP, sou wéi et keng gudd Atombomm gëtt !

Niewt den den Ausbeutungsmechanismen tëscht Norden a Süden gin et natierlech ausbeutungsmechanismen innerhalb vun den Gesellschaften am Norden.

Wien d'Grousskapital schount, muss d'Suen do siche goen wou se zwar net am meeschte sin, mee do wou et méi « einfach » se ze huelen : bei den normale Leit.

Daat as geschitt mat der Erhéijung vun der TVA déi jo am meeschte Wéih deet wou am mannste verdéngt gëtt. Pour le coup as do guer keng sozial Selektivitéit.

Déi nei Steier vun 0,5% reiht sech och an dës Logik eran – net nëmmen well se net progressiv as, mee well d'Leit erem eng kéier bezuele müssen fir Servisser wou se schon eemol bezuelt hun.

Dee sougenannten Zukunftspak, deen d'Gewerkschaften jo nach ëmmer ofleenen, gesäit eng helle Wull vu Mesüre vir, 258, déi zum groussen Deel net beziffert goufen an ondiskriminéiert Spuermesuren virgesin.

Mir haaten d'läscht Joer och eng Reih vun Entrevue'en mat sozialpoliteschen Acteuren wéi dem OGBL natierlech, dem Landesverband an souguer der Caritas.

Eis as et wichteg Allianzen anzegoen déi sou breed wéi méiglech sin fir déi sozialpolitesch Resistenz ze stäerken.

Mee weiderhin bleiwt fir eis de Logement dee Chantier wou schnell an direkt misst intervenéiert gin. Mir hun eis am Laaf vum Joer vill domadder beschäftegt, mir diskutéieren herno jo och nach eng Motioun dozou a wäerten deemnächst all eis Proposen öffentlech maachen.

Well fir de Logementsprobleem ze léisen, misst een Mesüren ergräifen déi eng richteg kopernikanesch Revolutioun bedeite géifen. An et géif een och géint d'Intressen vun den Promoteuren goen. An daat wëllt d'DP net. Wann de Guy Foetz am stater Gemengerot freet ob genuch Schouklasse um Ban de Gasperich virgesi sin an hien als Aentwert kritt daat kéint een net soen well et wéisst een net waat de Promoteur wëlles huet a Punkto Logement, da soll een sech wierklech näischt vun enger DP erwaarden.

Et as tragesch, well de Logement as ee vun den Haptprobleemer hei am Land. A wie mengt, eng Politik vun

der Offer géing iergendwéi dozou bäidroen datt méi erschwinglechen Wunnensraum geschaafe géif gin, deen iert. Daat eenzegt waat daat bezwecke wäert, daat as de Promoteure nach méi Geld eranzebréngen, ouni ze wëssen fir wien a zu waat fir eng Tariffer si bauen.

Mir müssen am Logement radikal emdenken : de Logement kann een net méi dem fräie Maart iwverloossen, well daat as gescheitert.

De Staat an d'Gemengen müssen Bauhär spillen.
D'Bevölkerung muss agegliddert gin an Entwécklungsprojet'en.

Esouvill Bauterrain'en wéi méiglech müssen an öffentlecher Hand bleiwen.

Loyers'en müssen strikt gereegelt a plafonnéiert gin an d'Rechter vun de Locataires ausgedehnt gin.

Lëtzebuerg e Land vu Propriétaires ? Jo, war et bis elo zu 2/3. Et kann een och verstoen datt d'Leit et berouegend fannen en Terrain ze hun mat engem Haus drop, well daat nach als sécher Investitioun duerstellt, zemoos fir Krisenzäiten z'iwverbréken.

Mee fir e wuessenden Deel vun den méi jonken Générations stellt sech ganz einfach de Probleem fir iwverhapt sech net mat engem Loyer ze ruinéieren.

Leider muss een dovunner ausgoen datt den Echech vun der Regierung an der Logementspolitik virprogramméiert. Si

versicht zwar deen ongeheiren Koustall am Ministär selwer an am Fonds du Logement vun der CSV-Vetternwirtschaft ze botzen, mee et mécht een zu Lëtzebuerg keng Logementspolitik mat den Promoteuren zesummen. Wann een d'Muecht vun den Promoteuren net radikal brécht, da brauch een guer net unzufänken.

Et as u sech e glécklechen Zoufall datt eise Kongress den 25. Abrëll stattfënnt, also genau 41 Joer no der Nelkerevolutioun a Portugal.

Et war eng Zäit vun Oproch. Net just den Enn vum Faschismus a Portugal (an am selwechten Zäitraum och a Spuenien an a Griechenland), mee de Versuch eng sozial an demokratesch Revolutioun hinzekréien.

Vill vun eisen auslänneschen Matbierger si Portugiesen a hun dës Zäit och erliewt. Hinnen vu mer vill ze verdanken. Vill vun hinnen hun um Bau geschafft, respektiv schaffen nach ëmmer do an d'Land konnt sech opgrond vun hirer belleger Arbechtskraaft opbauen.

Den 7. Juni kënnen d'Lëtzebuerger entscheeden ob déi Leit, déi dëst Land opgebaut hun an an allen Hisiichten beräichert mol vläit och kennen u Wahlen deelhuefen.

Et gött sou lues un der Zäit datt d'Lëtzebuerger de Wäert vun dëse Leit unerkennen. Daat wäert och dem lëtzebuerger Salarié zegudds kommen wa méi schaffend Leit matwiele goen.

Wann de Lëtzebuerger Salarié huet méi gemeinsames mam
auslänneschen Salarié wéi mam lëtzebuerger
Groussbourgeois. Esou eppes wéi national Solidaritéit gött et
net a gouw et nach nie.

Daat muss een och deene soen déi fir de NEEN antrieden :
duerch hir Positioun maachen se soss näischt wéi daat
schaffend Vollék ze schwächen a géinteneen opzespillen.

Déi Häre Wurth a Kinsch hu vläit de Pass mam roude Léiw
drop, sou wéi ech och, mee si liewen net an der selwechter
Welt wéi ech. Hir Heemecht as déi vum Fric, vun den
Milliounen, vun den Milliarden.

Meng Heemecht, eis Heemecht, daat as déi vun de Botzfraen
déi fir den qualifizierten Mindestloun kämpfen.

Eis Heemecht daat sin d'Studenten déi, viru genau engem
Joer, fir hir Rechter streiken.

Eis Heemecht, daat as den afrikaneschen Flüchtling deen
Opfer vu Krich an Ausbeutung as – an den Europäer oder
Lëtzebuerger deen hien ausbeut as net eis Heemecht.

Demokratie, daat as vill, vill méi wéi reegelméisseg seng
Vertrieder an de Parlamenter ze wielen – kleng Klammer : ech
si perséinlech och en Unhänger vun der Revocabilitéit vun
den Mandater, waat jo eng laang Fuederung as vun der
Arbechterbeweejung an déi och vun der Commune de Paris
praktizéiert gouf.

D'Demokratie, daat as d'Ausübung duerch d'Vollék, esou direkt wéi méiglech, vun der Muecht – vun der politescher Muecht mee déi politesch Muecht as näischt ouni déi ekonomesch Muecht. Well schlussendlech décidéiert ëmmer deen, deen iwwert d'Kapital verfügt.

An dofir soe mir datt dës Regierung inkohärent as, wa si engem Deel vun den Ausländer méi politesch Matentscheidung gi wëllt, awer anerersäits eng Wirtschaftspolitik bedreiwte déi d'Multi'en favoriséiert an esou dem ganze Vollék ekonomeschen Pouvoir entzitt.

Dofir, Jo zum Awunnerwahlrecht, Jo zum Jugendwahlrecht mee haaptsächlech Jo zur Erkämpfung vum méi sozialen an ekonomeschen Rechter am Alldaag, ob der Arbecht. Dofir si mir do, zesammen mat den Salariéen déi an hiren Gewerkschaften organiséiert sin. Daat as och eis Heemecht !